

ՔԱՂԱՔԱՇԻՆՈՒԹՅՈՒՆԸ ՀԱՅԱՍՏԱՆ ՄԻ ՔԱՆԻ ԳԱՂՔԱՎԱՅՐԵՐՈՒՄ

Հանրաքաղաքական դեպուտատ Վ. Մ. ՀԱՐՈՒԹՅՈՒՆՅԱՆ

Հայ ժողովրդի պատմական դժվարին ճակատագրի հետևանքով դեռևս վաղ միջնադարում սկսված արտագաղթը առավել մեծ չափերով շարունակվեց ուշ միջնադարում, երբ Հայաստանը հեծում էր օտար նվաճողների ծանր տիրապետության տակ: Տարբեր երկրներում հանգրվան գտած հայերը ստվարացրին գոյություն ունեցող գաղթավայրերը կամ ստեղծեցին նորերը: Լինելով շինարար ու ձեռներեց և հարմարվելով տեղի պայմաններին ու ձեռք բերելով որոշ արտոնություններ, նրանք զարկ տվեցին արհեստագործական արտադրությանը, առևտրի ու մշակույթի զարգացմանը, ծավալեցին շինարարական գործունեություն, օտար ափերում գոյատևելու հնարավորություններ ստեղծեցին իրենց համար¹:

Հայաստանից դուրս կառուցապատվեցին Նոր Զուղա, Նոր Նախիջևան, Գրիգորիոպոլ և Արմավիր քաղաքները, գյուղական բնակավայրերը: Հաստատվելով Մոսկվայում, Պետերբուրգում, Եկատերինոդարում (Կրասնոդար), Աստրախանում, Ստավրոպոլում, Ղզլտրում, Մոզդուկում, Կամենեց-Պոդոլսկում, Լվովում և այլուր, հայերը հիմնեցին հայկական փողոցներ, առևտրահասարակական կենտրոններ, առևտրական շարքեր ու պանդոկներ, կառուցեցին բազմաթիվ եկեղեցական և այլ բնույթի շենքեր:

Ռուսաստանի հայկական գաղթավայրերի շինարարական գործունեությունը նվիրված աշխատություններ արժեքավոր տեղեկություններ են պարունակում հայերի ծավալած քաղաքաշինական աշխատանքների, կառուցած տարաբնույթ շենքերի մասին²: Արտագաղթած հայերը նույն ջանքերը գործադրե-

¹ Հայ ժողովրդի պատմություն. հ. 4, Երևան, 1973, էջ 324—432: Վ. Ա. Միքայելյան. Ղրիմի հայկական գաղութի պատմություն. Երևան, 1964: Исторические связи и дружба украинского и армянского народов. Киев, 1985: Վ. Կ. Ոսկանյան. Ռուսաստանում հայկական գաղութների առաջացման պատմություն.—ՀՍՍՀ ԳԱ «Լրագրեր հաս. գիտ.» 1966, № 2: Վ. Բ. Բարխուդարյան. Նոր Նախիջևանի գաղութի պատմություն (1779—1861 թթ.). Երևան, 1967: Ж. А. Анаиан. Армянская колония Григориополь. Ереван, 1969: В. Р. Григорян. История армянских колоний Украины и Польши. (Армяне в Подолии). Ереван, 1980: Л. А. Погосян. Армянская колония Армавира. Ереван, 1981: Я. Р. Дашкевич. Армянские кварталы средневековых городов Украины.—Историко-филологический журнал, 1987, № 2, 3 և այլն:

² Այդ ուղղությամբ մեծ են Հ. Խ. Խալիֆախյանի ջանքերը: Իր աշխատություններից նշելի են. Армяно-русские культурные отношения и их отражение в архитектуре, Ереван, 1957; Застройка Армавира в XIX в.—В сб.: Проблемы истории архитектуры народов СССР, М., 1976; Сооружения армянской колонии в Каменец-Подольском.—Арх. наследство, вып. 28, М., 1980; Жилые дома армян на Дону (там же); К истории строительной деятельности армян на Дону.—«Պատմա-բանասիրական հանգես», 1974, № 2, էջ 175—173: Կարևոր են նաև А. Л. Якобсон. Армянская средневековая архитектура в Крыму.—Визант. временник. VII; Р. Т. Липка. Ансамбль армянской улицы. Львов, 1983. (ուկրաիներեն) աշխատությունները և Ջ. Գարսվելի Նոր Զուղայի ճարտարապետությունը նվիրված մենագրությունը (տե՛ս John Garswell. New Julfa. Oxford, 1969),

ցին Մերձավոր Արևելքում (Սիրիայում, Լիբանանում, Եգիպտոսում, Կիպրոսում), Իրանում, Հնդկաստանում, եվրոպական երկրներում (Բուլղարիայում, Լեհաստանում, Ռումինիայում, Հունգարիայում, Ֆրանսիայում, Իտալիայում, Հոլանդիայում) և այլուր:

Տարագիր հայերի շինարարական գործունեության պատմության կարևոր էջեր են կազմում մասնավորապես Նոր Զուլայի, Նոր Նախիջևանի և Գրիգորիոպոլի հիմնադրումն ու կառուցապատումը: Տարբեր պայմաններում իրականացված հատակագծերում արտահայտություն են գտել տեղական բաղաբանական և կղզեոճերներն ու ճարտարապետական ոճերը:

ՆՈՐ ԶՈՒՂԱՆ (Սպահանի արվարձանը) հիմնվեց, երբ Շահ Աբբաս I-ը (1587—1629) հրահանգով Զուլայից ու Արարատյան դաշտից բռնագաղթված հայերը, փոխադրվելով Իրան, բնակություն հաստատեցին Սպահանի մոտակա շրջաններում, իսկ մի մասը հանգրվանեց Նոր հիմնադրած բնակավայրում, որը ժառանգելով հին բնակավայրի անունը, կոչվեց Նոր Զուլա³:

Հին Զուլայից, Դաշտից ու Հայաստանի այլ բնակավայրերից բռնագաղթի ենթարկված հայերին նախապես տեղավորում են Ղազվին բաղարում և շրջակա գյուղերում: Ապա, ինչպես հայտնում է Առաքել Դավրիժեցին, գաղթելը բացվելուն պես ժվերստին վարեցին զնոսա մինչև տարեալ հասուցին ի բաղաբան Սպահան՝ և անդեն բնակեցուցին զնոսա՝ տուեալ նոցա տեղի շինութեանս⁴:

Այս նորահաստատ գաղթավայրի բնակիչները շուտով կարևոր դեր են ստանձնում Իրանի տնտեսական կյանքում, մեծ չափով նպաստում արհեստագործության (կերպասագործության, ոսկերչության, գորգագործության, ներկարարության և այլն) զարգացմանը: Վաճառականներին վստահվում է հում մետաքսի արտահանման մենաշնորհը, արևելքի և արևմուտքի միջև առևտրի իրականացման միջնորդի դերը: Շահ Աբբաս I-ի հրովարտակներով տրված արտոնությունների և հայկական համայնքի հանդեպ հոգատար վերաբերմունքի շնորհիվ, Նոր Զուլան ինքնավարության իրավունքներով օգտվող իր 30 հազար բնակչությամբ արդեն XVII դարում դառնում է առևտրական կապիտալի կենտրոն, ուշ միջնադարում՝ հայկական հոգևոր և մշակութային կյանքի կենտրոններից մեկը, որտեղ բացվում են հայկական տպարան (առաջինը Իրանում), Ս. Ամենափրկիչ վանքի դպրոցը, ուր դասավանդում էին եվրոպական լեզուներ և սկզբնականական արվեստ⁵:

Նոր Զուլան հիմնադրվում է հայերի Սպահան փոխադրվելու հաջորդ տարին՝ 1606 թ.: Հիմնադրումը կատարվում է Սպահանից հարավ, Զայանգերուդ գետի հարավափնյա կողմում հայերի բնակեցման համար Շահ Աբբաս I-ի հրովարտակով Սպահանի բաղաբանության (բալանթարի) միջոցով տրամադրված հողատարածության վրա: Պատմելով այդ մասին, Հ. Տեր-Հովնանյանը հայտնում է, որ հատակագիծը կազմվել է գեղեցիկ ճարտարապետությամբ և ըստ երկրաչափական գծագրության (առանց նշելու հեղինակի անունը)⁶: Հատակագծման ու կառուցապատման գործում դժվարություններ չեն առաջացել ջուղայեցիների ցանկությունները հաշվի առնելու տեսակետից, որովհետև հատկացված հողատարածությունը «արկակավայր դաշտ կամ կալուած հողագործութեան» էր⁷: Այդ տարածության վրա էլ արևմուտքից արևելք ձգվեց նազար (խոշա նազարի անունով) կոչված պողոտան՝ 3276 քայլ երկարությամբ (շուրջ 2,0 կմ) և 16 քայլ լայնությամբ (9,6 մ): Սա դարձավ Նոր Զու-

3 Հ. Տեր-Հովնանյանից. Պատմություն Նոր Զուլայու որ յԱսպահան. հ. 1—2, Նոր Զուլա, 1880—1881: Հայ ժողովրդի պատմություն, հ. 4, 5, Երևան, 1973—1974; В. А. Баһ-бурдян. Армянская колония Новой Джульфы XVII в., Ереван, 1969.


4 Պատմություն Առաքել վարդապետի Դավրիժեցու. Վաղարշապատ, 1896, էջ 363:

5 Հայ ժողովրդի պատմություն, հ. 4, էջ 324—337:

6 Հ. Տեր-Հովնանյանից. նշվ. աշխ., էջ 39:

7 Առաքել Դավրիժեցի, էջ 364:

դալի առևտրահասարակական կենտրոնը: Պողոտայի երկու վերջավորություններում (որտեղ երբեմնի պարիսպներով շրջապատված քաղաքի երկու դարպասներն էին) իրենց մենատները կառուցեցին մեծահարուստները, այդ թվում լուսավորչական եկեղեցուն դավանող խոջա Սաֆրազն ու կաթոլիկ խոջա Շահ-րիմանը, որի պատճառով արևմտյան դարպասը կոչվեց Սաֆրազյանների, իսկ արևելյանը՝ Շահրիմանյանների անունով⁸:



Նկ. 1. Նոր Զուղայի հատակագիծը (ըստ Վ. Գարսվազի)

Նաղար պողոտայից սկզբնավորվում և հյուսիսից հարավ են ձգվում ռուս-դաճիգ և լայնարձակ տասը փողոցներ, հասնելով մինչև դաշտը, ուր բնակավայրի գերեզմանոցն է, հոյակապ քանդակներով զարդարված տապանաքարերով: Սկզբնապես «Ճասնյակ» կոչված այդ փողոցները հետագայում նրանց շարունակությունը կազմող նրբանցքների հետ վերանվանվեցին քաղաքի մեծահարուստների անուններով (Դիլաքյանների, Մեծ խոջայի, Փիրմանեց, Գիլանեց, Բաղրամյանեց, Ավագյանեց, Միրվանյանեց, Զեքյանեց և այլն): Այդ համակարգի փողոցների մեջ տարանցիկը Հակիմ Նիզամի (Նախկին Չարսուի) պողոտան էր, որը ողջ բնակավայրով հարավից հյուսիս ձգվելով ու հատվելով Նաղար պողոտայի հետ, Ջայանգերուդ գետի վրա ձգված կամրջային անցումով հասնում է Սպահանի կենտրոնը⁹:

Հիշյալ փողոցներով առաջացած թաղամասերը (որոնց մի մասը միայնկանոնավոր ձևեր ունի) նույնպես իրենց անունները ստացան (Երևանի, Թավրիզի, Հակոբջանյանների, Մեծ Մելիքան, Փոքր Մելիքան, Չարսու, Քոչեր, Շարաբել), ըստ որում դրանցից Մեծ և Փոքր Մելիքաններն ու Չարսուն (շուկայի

⁸ Հ. Տ Բ-2 ով հ ա ն յ ա ն ց. նշվ. աշխ., էջ 39:

⁹ Սխեմատիկ հատակագիծը բերված է Զ. Գարսվազի նշված աշխատության մեջ, 19-րդ էջում:

հրապարակը) հասարակական կենտրոնների նշանակություն ունեն։ Այդ թաղասաները նախապես Ջուղա էին կոչվում։ Երևան, Թավրիզեցոց կամ Մահալաբ, Քուշեր և Գաղզ կոչված թաղամասերը ավելացվեցին հետագայում, երբ Սպահանի քաղաքամիջի հայերն այստեղ փոխադրվեցին ու նորաստեղծ բնակավայրը նոր Ջուղա կոչեցին։

Վերը թվարկած թաղերն ունեին իրենց թաղային եկեղեցիները (ըստ Հ. Տեր-Հովնանյանցի՝ 17), այդ թվում մեկը Մեծ Մեյդանում՝ Ս. Ամենափրկիչ կաթողիկեն։ Դրանցից մի քանիսը շարքից դուրս են եկել և Ջ. Գարսվելի ուսումնասիրության մեջ ընդգրկված են 13-ը։ Թաղամասերով անցնող փողոցների երկու կողմերում ծառերի շարքեր և առուներ են ձգվում։ Այս է Սպահանին կից առաջացած հայկական նոր Ջուղա բնակավայրի հակիրճ նկարագիրը։

Նոր Ջուղան իր ծաղկումն ապրեց XVII դարի ընթացքում, հատկապես կեսին և երկրորդ կեսին։ Դարավերջին ստեղծված աննյաաստ պայմանները (Իրանի տնտեսական ճգնաժամի, հայերի արտոնությունները սահմանափակելու, ազգային կրոնական հալածանքների ուժեղացման) պատճառով նոր Ջուղան սկսում է անկում ապրել, մեծահարուստների մի մասը փոխադրվում է Հնդկաստան և այլ երկրներ։

Նոր Ջուղայի կառուցապատման, շենքերի ճարտարապետության ու ներքին ճոխ բարեզարդման մասին ուշագրավ տեղեկություններ է հայտնում Առաքել պատմիչը. «...շինեցին յարկս և բնակութիւնս ինքեանց՝ հրաշալի յօրինուածովք, կամարակապ փողոցօք, թևաւոր ապարանօք, և ամարասուն հովանոցօք, բարձրաբերձ և արքայակերպ շինուածօք, զարդարեալ և յօրինեալ ի ծաղիկս ոսկոյ և լաշվարդի՝ և պէս պէս երանգաց ակնախտիղ տեսողաց։ Սոյն պէս շինեցին և զեկեղեցիսն հրաշազան յօրինուածովք ըստ արժանւոյն փառացն Աստուծոյ, երկնաման խորանօք և գերամբարձ կաթողիկէիք, բովանդակ ծաղկեալ պէս պէս երանգովք ոսկով և լաշվարդով, տնօրիկանօք Տեառն և պատկերովք սրբոց։ Եւ ի գլուխ կաթողիկէից ամենայն եկեղեցաց կառուցե, զնշան սրբոյ խաչին նոցին եկեղեցեացն ի պսակ և ի պարծանս քրիստոնէից»¹⁰։

Այդպիսին է նոր Ջուղայի փառքի ականատես Առաքել Դավրիժեցու գնահատականը, որը հաստատվում է նաև քաղաքն այցելած օտարերկրյա ճանապարհորդների Տավերնիեի, Տուրնեֆորի, Շարդենի և ուրիշների նկարագրություններով։ Ջոն Գարսվելը, անդրադառնալով քաղաքի այժմյան վիճակին, նշում է. «...մի քանի տասնյակ ճարտարապետական հուշարձաններ պերճախոս ականատեսներ են նոր Ջուղայի երբեմնի ծաղկուն և երփներանգ տարիներին»¹¹։

ՆՈՐ ՆԱԽԻՋԵՎԱՆ. Ռուս-թուրքական 1768—1774 թթ. պատերազմի հաջող ավարտից հետո վերջապես առիթ է ստեղծվում իրականացնել Ղրիմի խառնությունը թուլացնելու նպատակով Տավրիկյան թերակղզում դեռևս միջնադարում հանգրվանած քրիստոնյա (հայեր և հույներ) բնակչությունը Ռուսաստանի հարավային, համարյա անմարդաբնակ տափաստանները փոխադրելու մասին ռուսական միապետության վաղեմի մտադրությունը¹²։


Ձի կարելի ասել, թե տեղահանության գաղափարը հավասարապես բաժանում էին ղրիմահայության բոլոր շրջանները։ Թեև վերնախավը, հատկապես մեծահարուստների դասը, վերաբնակեցման ջերմ կողմնակից էր, որովհետև այդ միջոցով նպատակադրվում էր առավել շահավետ առևտրական գործարքներ ծավալել լայնածավալ Ռուսաստանի շուկաներում, սակայն ղրիմահայերի զգալի մասը չէր հաշտվում դարերի ընթացքում բազում ջանքերով

¹⁰ Առաքել Դավրիժեցի, էջ 63—64։

¹¹ John Garswell. Op. cit., p. 15.

¹² Հայ ժողովրդի պատմություն. հ. 4, էջ 415—416։

սահմանափակ ընակատեղերը, գործատեղերը, խնամված այգիներն ու պարտեզները, հարազատների շիրմները, վանքերն ու եկեղեցիները լքելու մտքի հետ¹³։ Այնուհանդերձ թուրք-թաթարական ծանր լծից ազատագրվելու ձգտումը հաղթանակեց։ Ռուսաստանի հայ լուսավորչական եկեղեցու առաջնորդ, արքեպիսկոպոս Հովսեփ Արղության-Նրկայաբազուկը և ղրիմահայության համաբավոր գերդաստանի ներկայացուցիչ Հովհաննես Լազարյանը ղրիմահայերի անունից խնդրամատույց եղան Նկատերինա II կայսրուհու առաջ՝ Ռուսաստանի հովանավորության տակ անցնելու մասին։ Կայսրուհու հատուկ հրովարտակով փոխադրվողներին ընակության տեղ է հատկացվում Ազովի նահանգում¹⁴։



Նկ. 2. Նոր Նախիջևան քաղաքի հատակագիծը (ըստ Հ. Խալիպալյանի)

Ռուսական արքունիքի հետ բանակցություններ վարելու գործում բարի միջնորդի դեր է կատարել Նովոռոսիայի կառավարիչ գեներալ Գ. Ա. Պոտյոմկինը։ Վերջինս ի կատարումն կայսրուհու հրամանի ղրիմահայերին հաղթանակից հետո գործի կազմակերպումը հանձնարարում է գեներալ պորուչիկ (հետագայում նշանավոր ռուս զորավար) Ա. Վ. Սուվորովին¹⁵։ Նրա գլխավորությամբ Ղրիմի տարբեր ընակավայրերից՝ Կաֆայից, Բախչիսարայից, Ղարասու-բազարից, Կոզլովից ու շրջակա գյուղերից 1778 թ. սկսվում է հայերի առաջին տեղահանությունը։ Այդ և հաջորդ տարում արտագաղթի են ենթարկվում ընդհանուր թվով 12.600 հայեր, որոնք գաղթի ճանապարհներին կրում են բազում փորձություններ և նյութական զրկանքներ։

Նկատերինա II կայսրուհու 1779 թ. նոյեմբերի 14-ի հրովարտակով վերաբնակեցման ենթարկված հայերին տրվեցին մի շարք առանձնաշնորհումներ։ Նրանք 10 տարով ազատվեցին հարկերից, ստացան Ռուսաստանում և նրա սահմաններից դուրս առևտրով զբաղվելու, ինչպես նաև երկրագործության (յուրաքանչյուր երկրագործին տրամադրվել 30 դեսյատին հողամաս) և արդյունագործությամբ պարապելու իրավունք։ Շնորհված արտոնություններ

¹³ Վ. Բ. Բարիսուդյան. Նոր Նախիջևանի հայկական գաղութի պատմություն (1779—1861), էջ 37—41։

¹⁴ Նույն տեղում, էջ 46։

¹⁵ М. Г. Нерсисян. А. В. Суворов и русско-армянские отношения в 1770—1780-х годах. Ереван, 1981, с. 8—28.

րի կարևոր մասն էին կազմում դավանանքի ազատությունը, մայրենի լեզվով դատավարության (Աստրախանի հայոց դատաստանագրքով) իրավունքը: Ինքնավարությունն իրականացվում էր քաղաքապետարանի (մագիստրատի) միջոցով, որին ենթակա էին դատական և ոստիկանական մարմինները:

Հայ գաղթականների բնակեցման համար հատկացվում է Դոն գետից հյուսիս ընկած աջափնյա ընդարձակ տարածությունը: Դոնի անմիջական ափին, Ս. Դմիտրի Ռոստովսկու ամրոցին մոտ հատկացված հողատարածության արևելյան սահմանի վրա հիմնադրվում է Նոր Նախիջևան քաղաքը, իսկ դրանից հյուսիս և հյուսիս-արևմուտք ընկած տարածքի վրա տեղաբաշխվում են Մեծ Սալա, Սուլթան Սալա (կամ Փոքր Սալա), Նեսվիտա, Թոփտի (կամ Ղրիմ), Չալթր, իսկ հետագայում՝ Կատերինավան (կամ Սամբել) գյուղական բնակավայրերը¹⁶:

Նոր Նախիջևանն ու շրջակա գյուղերը կազմեցին արտագաղթած ղրիմահայերի հիմնական խմբավորման բնակավայրերը, բայց ոչ բոլոր: Նրանց որոշ մասը տեղավորվեց նույն նահանգի այլ բնակավայրերում՝ Ազովում, Չերկասկում (այժմ Ստարոչերկասկ), Տագանրոգում, Կուրան և Թերեք ստանիցաներում¹⁷: Նյութական մեծ ներդրումներ պահանջող Նոր Նախիջևանի և հիշատակված գյուղերի կառուցապատմանը նպաստելու համար Սկատերինա II կայսրուհու հրովարտակով տեղական իշխանություններին թուլյատրված էր պետական գանձարանի հաշվին կառուցապատողներին (հատկապես մենատներին) անվճար տրամադրել շինանյութեր, այդ թվում անտառանյութ: Դրա հետ մեկտեղ, տեղահանված հայերին պետական գանձարանի հաշվին զգալի գումար է հատկացվել՝ կապված գաղթագնացության և տեղավորվելու ծախսերի հետ¹⁸:

Նոր Նախիջևանի հիմնադրման հանդիսավոր արարողությունը տեղի է ունենում 1781 թ. ապրիլի 21-ին, որի ժամանակ արքեպիսկոպոս Հովսեփ Արղուիսյանը կարդում է Սիմեոն Նրևանցի կաթողիկոսի կոնդակը, օծում բնակավայրի հողն ու ջուրը, քաղաքի շորս անկյուններում դրվելիք հիմնաքարերը, որոնք հանդիսավոր թափորի ուղեկցությամբ տեղավորվում են ապագա քաղաքի ծալրանկյուններում¹⁹:

Նորահաստատ քաղաքը ստանում է իր տարբերանշանը, որը խորհրդանշելով հայերի աշխատասիրությունը, պատկերում է մեղունք և փեթակ: Սկզբնապես Նախիջևան (հայերի կողմից՝ Նոր Նախիջևան) կոչված քաղաքը Արաքս գետի ափամոտ Նախիջևանից տարբերելու համար 1838 թ. վերանվանվում է Դոնի Նախիջևան²⁰:

Նոր Նախիջևանի կառուցապատման սկզբունքի մասին գաղափար են տալիս հրատարակված գլխավոր հատակագծերը²¹: Վ. Բարխուդարյանի հրատա-

¹⁶ О. Х. Халпахчьян. Жилые дома армян на Дону.—Арх. наследство, вып. 33, М., 1985, с. 123. Հեղինակը կազմել է հատկացված հողատարածության և հիմնադրած բնակավայրերի սխեմատիկ քարտեզը:

¹⁷ Նույն տեղում, էջ 122:

¹⁸ Վ. Բ. Բարխուդարյան. նշվ. աշխ., էջ 59—60:

¹⁹ Նույն տեղում, էջ 55:

²⁰ О. Х. Халпахчьян. Жилые дома армян на Дону, с. 122.

²¹ О. Х. Халпахчьян. Армяно-русские культурные отношения, рис. 36; Он же. Культурные сооружения новонахичеванских армян, с. 108. 2. Խ. Խալփախյանը ներկայացրել է արխիվային փաստաթղթի (ЦГВИА, ВУА, д. 22214) հիման վրա իր կողմից կազմած սխեմատիկ հատակագիծը, իսկ Վ. Բարխուդարյանը՝ Ռոստովի մարզային պետական արխիվում (ֆոնդ 579) գտնվող Վերջինս հիշատակված է որպես իսկականի պատճեն, կատարված ճարտ. օգնական Յակով Շարինֆաևու կողմից 1836 թ.: Վ. Բարխուդարյանը, առանց հիշատակելու աղբյուրը, որպես հատակագծի հեղինակ նշել է Ի. Ստարովին, 2. Խալփախյանը (տե՛ս Культурные сооружения новонахичеваиских армян, с. 109) Ստարովին վերագրում է միայն Նոր Նախիջևանի Ս. Խաչ վանքի եկեղեցու նախագծի հեղինակությունը:

րական հատակագիծն ունի սաժենային մասշտաբ ու վերնագրված է «План Полкопия(?) городов Ростова крепости св. Дмитрия и армянского города Нахичевана состоящих Екатеринбургской Губернии». Քաղաքաշինական այդ փաստաթուղթը, որում ներկայացված են նոր նախիջևան և նրանից ավելի ուշ՝ 1811 թ. հիմնադրված Ռոստով քաղաքների հատակագծերը, կազմված է համաձայն XVIII դարի երկրորդ կեսից Ռուսաստանում լայն տարածում ստացած կանոնավոր հատակագծման (регулярная планировка) սկզբունքի:

Ռուսաստանի քաղաքաշինության մեջ այդ սկզբունքը սկսեց արմատավորվել 1763 թ. օրենքից հետո, որի համաձայն յուրաքանչյուր նահանգի տներն ու փողոցները պետք է կառուցվեին հատուկ նախագծերով, որպիսիք պետք է կազմվեին ուսական շատ քաղաքների վերակառուցման կամ նորերի կառուցապատման համար: Այդ կատարվում էր «Սանկտ-Պետերբուրգի և Մոսկվայի քարե շինությունների հանձնաժողովի» (ստեղծված 1762 թ.) կողմից կամ նրա անմիջական հսկողության ներքո: Սենատոր Ի. Ի. Բիցկու գլխավորությամբ հանձնաժողովի կազմում մտնում էին իր ժամանակի ուս նշանավոր ճարտարապետներ, այդ թվում Ի. Ե. Ստարովը: Մինչև դարավերջ մշակվել և հանձնաժողովի կողմից հաստատվել են 400 քաղաքների գլխավոր հատակագծեր: Դրանց հիմքում ընկած էր անտիկ հունա-հռոմեական քաղաքաշինական արվեստից ժառանգաբար որդեգրած բնակավայրի հատակագծային հորինվածքը՝ ըստ ամենայնի երկրաչափական կանոնավորությամբ, փողոցների որոշակի դիրքորոշմամբ երկրի կողմերի նկատմամբ (հյուսիս-հարավ, արևելք-արևմուտք): Այդ հորինվածքին բնորոշ է փոխուղղահայաց փողոցների ցանցով քաղաքատարածության պատումը, փողոցների հատումով ուղղանկյուն լճաճամասերի կազմավորումը, գլխավոր և երկրորդական առևտրահասարակական և պաշտամունքային կենտրոնների տեղաբաշխումը և այլն²²:

Նոր նախիջևանի հատակագիծը՝ հաստատված «Սանկտ-Պետերբուրգի և Մոսկվայի շինությունների հանձնաժողովի» կողմից 1781 թ. նոյեմբերին²³, քաղաքաշինական նույն սկզբունքի կիրառության օրինակներից մեկն է և մշակված է դրա պահանջների իմացությամբ: Ըստ այդ փաստաթղթի քաղաքն ընդգրկել է շուրջ 350 հա (800×980 սաժ.) տարածություն²⁴, որը պատված է փոխուղղահայաց փողոցների կանոնավոր ցանցով, առաջացնելով տարբեր չափերի ուղղանկյուն թաղամասեր:


Հասարակական-պաշտամունքային կենտրոնը հանդիսանում էր քառանկյունի ընդարձակ (150—220 սաժ., 7,0 հա) հրապարակը: Նրա մեջտեղում 1783—1807 թթ., ենթադրաբար Ի. Ե. Ստարովի նախագծով, կառուցվել է քաղաքի Ս. Գր. Լուսավորիչ գլխավոր եկեղեցին (քանդվել-վերացվել է 1960-ական թթ.): Դրան ժամանակակից է քաղաքից ոչ հեռու, հյուսիսակողմում, 1786—1792 թթ. կառուցված Ս. Խաչ վանքի եկեղեցին, որի նախագծի հեղինակը նույնպես Ի. Ե. Ստարովն է ենթադրվում: Քաղաքի Ս. Համբարձման, Ս. Թեոֆանուս, Ս. Աստվածածին, Ս. Նիկողայոս, Ս. Գևորգ և Ս. Կարապետ թաղային եկեղեցիները, ինչպես նաև Սուլթան Սալայի (XIX դարի կես), Նեսվի-

²² А. В. Бунин, Т. Ф. Саваренская. История градостроительного искусства. М., 1979. Т. I, с. 366—465; Т. С. Проскурякова. О регулярности в русском градостроительстве XVII—XVIII вв.—Арх. наследство, вып. 28, М., 1980, с. 37—46; О преемственности в русском градостроительстве II половины XVII в.—Арх. наследство, вып. 33, М., 1985, с. 40—51. Սրանցում բերված օրինակներում չեն հիշատակված նոր նախիջևանի, Գրիգորիոպոլի և Ռոստովը, որոնց գլխավոր հատակագծերը մեծ ընդհանրություն ունեն լուգայի (1775), Մոսալսկի (1779) և այլ քաղաքների գլխավոր հատակագծերի հետ:

²³ О. Х. Халпахчьян. Культовые сооружения новонахичеванских армян, с. 107.

²⁴ Չափերը մոտավոր են:

տալի Ս. Կարապետ (XIX դար), Չալթրի Ս. Համբարձման (1860—1877 թթ.)- Մեծ Սալալի Ս. Աստվածածին (1860—1867 թթ.), Ղրիմի (Թուֆթի) Ս. Ամենափրկիչ (XIX դար) եկեղեցիները համարյա զուրկ են հայկական ճարտարապետության նկարագրից, արտահայտում են ռուսական կլասիցիզմի ճարտարապետական ոճը²⁵։ Նույնպիսին է նոր Նախիջևանի զգալի թվով մենատների



Նկ. 3. Գրիգորիոպոլ քաղաքի հատկագիծը

(Ն. Տիտրովայի, Գ. Չուբարովի, Մորոզովների, Ի. Կելե-Շագինովի, Ի. Բալաբանովի, Լ. Պոպովի, Ն. Կրասիլնիկովի և այլոց) ճարտարապետական նկարագիրը²⁶։ Պետք է ենթադրել, որ դրանց համահունչ է քաղաքի առաջմ ուսումնասիրության շրջագրված վարչա-հասարակական և ուսումնական շենքերի ճարտարապետությունը։

Գրիգորիոպոլի հիմնադրումը տեղի ունեցավ 1787—1791 թթ. ռուս-թուրքական պատերազմից հետո, երբ տարած հաղթանակի և կնքած պայմանագրի համաձայն Մոլդավիայից և Բեսարաբիայից գաղթեցվեցին շուրջ 4000 հայեր ու ժամանակավորապես տեղավորվեցին Դուբասար քաղաքում, որպեսզի հետագայում վերաբնակեցվեն այդ նպատակով կառուցապատվող Գրիգորիոպոլ քաղաքում, Իոսիֆովկա ու Վասիլևկա գյուղերում²⁷։ Գրիգորիոպոլը նախատեսվում էր Ակկերմանից, Իզմայիլից, Քաուշանից, Բենդերից և Քիլից հայերի վերաբնակեցման համար։ Զուգահեռաբար ջանքեր էին գործադրվում, որ-

²⁵ О. Х. Халпахчьян. Культовые сооружения новонахичеванских армян, с. 107—121. Հնդիսակը ներկայացրել է հիշատակված եկեղեցիների հատկագիծն ու լուսանկարները։

²⁶ О. Х. Халпахчьян. Жилые дома армян на Дону, с. 122—139.

²⁷ Հայ ժողովրդի պատմություն. հ. 4, էջ 416։

պետքի, ի թիվս մեծահարուստ վաճառականների, այստեղ հայեր փոխադրվել են նաև կոստանդնուպոլսից և Հնդկաստանից²⁸։

Գրիգորիոսյոյի հիմնադրման ծրագրի իրականացումը Եկատերինա II կայսրուհին հանձնարարում է իշխան Գ. Ա. Պոտյոմկին-Տավրիչեսկուն և Ռուսաստանում հայ լուսավորչական եկեղեցու թեմական առաջնորդ, արքեպիսկոպոս Հովսեփ Արղուիսյան-Երկայնաբազուկին։ Այդ գործում իրենց մասնակցությունն են բերել նաև «այլաբաղյան դեսպան» Ստեփան Դավթյանը (որը դեռ 1789 թ. թուրքերի դեմ մղած պատերազմի ժամանակ գլխավորել էր տեղի հայերից կազմված կամավորական ջոկատները), արքեպիսկոպոս Գրիգոր Զաքարյանը, ինչպես նաև ռուս մեծ գորավար Մ. Ի. Կուտուզովը²⁹։

Բնականաբար, թուրքական տիրապետությունից ազատագրվելու ձգտող հայերի մեծ մասը հոժարակամ համաձայնվեց փոխադրվել Ռուսաստան, ապավինել քրիստոնյա պետության պաշտպանությանը, ինչի մասին շատերը բազմիցս դիմել էին Հովսեփ Արղուիսյանին, Ստեփան Դավթյանին և ռուսական հրամանատարությանը։

Բավարարելով հայերի կողմից ներկայացված դիմումին, Գրիգորիոսյոյ թաղաքի կառուցապատման համար տրամադրվում է Տիրասպոլ թաղաքից 45 կմ հյուսիս-արևմուտք, Չորնայա և Չորնիցի հովիտների ելուստում ընկած Դենեստր գետի ձախափնյա հողատարածությունը, որպիսին հարմար է նկատվում բնակչության առևտրով և այգեգործությամբ զբաղվելու համար։ Քաղաքի հատակագծման ու կառուցապատման հետ կապված բազմապիսի հարցերի լուծմամբ զբաղվում են Եկատերինոսլավի գավառապետ Վ. Վ. Կախովսկին և արքեպիսկոպոս Հովսեփ Արղուիսյանը³⁰։

Տրամադրված հողատարածությունը ուսումնասիրելուց հետո, 1791 թ. հանձնարարվում է կազմել Գրիգորիոսյոյի գլխավոր հատակագիծը, որը պատրաստ վիճակում ներկայացվում է հաստատման 1792 թ. ապրիլի կեսին։ Հովսեփ Արղուիսյանի եղբորորդուն՝ Բարսեղ Արղուիսյանին է հանձնարարվում հատակագիծը հաստատման ներկայացնել Եկատերինա II կայսրուհուն, որը 1792 թ. հունիսի 10-ին հաստատում է Գրիգորիոսյոյի գլխավոր հատակագիծը և հատուկ սուրհանդակի միջոցով հետ ուղարկում Դուբոսար, ուր այն հասնում է հուլիսի 17-ին³¹։

Հուլիսի 25-ին նախապատրաստություններ են տարվում, իսկ 26-ի առավոտյան տեղի է ունենում Գրիգորիոսյոյի հիմնադրման հանդիսավոր արարողությունը։ Վ. Վ. Կախովսկու և Հ. Արղուիսյանի գլխավորությամբ արարողությանը մասնակցելու էին եկել արտասահմանից հրավիրված հյուրեր, իշխաններ, պաշտոնյաներ, ազնվականներ, հայկական, ռուսական և մոլդավական եկեղեցիների բարձրաստիճան ներկայացուցիչներ, հասարակ ժողովուրդը՝ այստեղի ապագա բնակիչները։

Նոր հիմնադրած թաղաքի կառուցապատման աշխատանքների կազմակերպման համար փոխգնդապետ Մ. Զվերյովի ղեկավարությամբ ստեղծվում է «շինարարական արշավախումբ» կոչված հիմնարկությունը, լուծվում են շինանյութի հայթայթման, շենքերի նախագծերի (բնակելի տները՝ տիպային) ապահովման, նրանց իրականացման համար պետական ֆինանսավորման (յուրաքանչյուր բնակելի տան համար՝ 230 ռ. 50 կ.) և այլ հարցերը։ Քաղաքապետ է նշանակվում Նոր Նախիչևանից հրավիրված, գաղթականների բնակեցման ու թաղաքի հիմնադրման ջանքերին մասնակցություն բերած հայագրի պորուչիկ Պավել Թումանովը։ Այդ միջոցառումների շնորհիվ Գրիգորիոսյոյում ծավալվում են կառուցապատման աշխատանքները։ Արդեն հաջորդ ամսին կառուցված էին 100-ից ավելի բնակելի տուն, 16 խանութ, այլ շենքեր,

²⁸ Ж. А. А н а н я н. Указ. соч., с. 30—35.

²⁹ Նույն տեղում, էջ 31։

³⁰ Նույն տեղում, էջ 28—95։ Ժ. Անանյանը արխիվային փաստաթղթերի հիման վրա հանգամանորեն շարադրել է թաղաքի հիմնադրման և կառուցապատման պատմությունը։

³¹ Նույն տեղում, էջ 61, 64—65։

փորված էին 43 ջրհոր³²։ Առավել ինտենսիվորեն կառուցապատման աշխատանքները շարունակվեցին 1793-ին և հիմնականում ավարտվեցին XIX դարի սկզբներին։

Նկատելի է II կայսրուհու 1794 թ. հոկտեմբերի 12-ի հրամանագրով Գրիգորիոպոլի մտավ նկատելիորեն նահանգի մեջ, ստացավ իր տարբերանշանը (գերբը), կնիքը, քաղաքապետարանին (մագիստրատին) հասնող դասախոս-ներկայացուցչական հաստիքները։ 325 ընակելի տների, քաղաքապետարանի, եկեղեցիների և այլ շենքերի կառուցման համար տրամադրվեց ավելի քան 100 հազար ռուբլի։ Քաղաքի բնակչությանը շնորհվեցին մի շարք արտոնություններ, այդ թվում՝ ազատ առևտրի։

Գրիգորիոպոլի կառուցումն իրականացվել է ըստ գլխավոր հատակագծի՝ ևսագմված հոռաչափ Պավել Զուրկի կողմից։ Այդ հատակագծի հայերեն մակագրություններ ունեցող ու «Ձև Գրիգորիոպոլին Հայոց» («План городу Григорополю») անվանված տարրերակը 34×44 սմ չափի մետաղաթերթի վրա 1793 թ. Սանկտ-Պետերբուրգում հայերը փորագրել են տվել սուրաթարնակ օուղալեցի Հովհաննան աղա Գերաքյանի ծախքով։ Դա քաղաքաշինական հետաքրքիր փաստաթուղթ է, այն էլ հայերեն (թերևս միակը) մակագրություններով³³։

Ըստ այդ հատակագծի Գրիգորիոպոլի քաղաքատարածությունը նոր նախիջնանի պես գետափնյա տեղագրություն ունի նավարկելի Դնեստր գետի ձախ ափին ու նույնպես կազմված է եանոնովոր կառուցապատման սկզբունքով։ Տարբերությունը դիրքորոշումն է երկրի կողմերի նկատմամբ։ Գրիգորիոպոլի հատակագիծն ունի XVIII դարի երկրորդ կեսի ողջական քաղաքաշինական արվեստին համապատասխանող հատակագծային կուռ կառուցվածք, որում համակողմանի լուծում են ստացել բնակեցման և բնակիչների հասարակական սպասարկման հարցերը։ Դրանց թվին է պատնանում նաև օրամասակարարման հարցը։ Այն կարգավորված է Չորնի ձորից ջրատարի կառուցմամբ։ Դրանով դեպի քաղաք հոսող խմելու ջուրը տեղաբաշխվում էր Գրիգորիոպոլի գլխավոր և թաղային հրապարակները, ուր նախատեսված էին համայնական օգտագործման ծորակներ։

ГРАДОСТРОИТЕЛЬСТВО В РЯДЕ АРМЯНСКИХ КОЛОНИЙ

Доктор архитектуры В. М. АРЗТЮНЯН

Резюме

На основании литературных источников и исследования об армянских колониях в статье описывается строительная деятельность армян за пределами Армении, дается общая градостроительная оценка застройки Нор-Джуги (основан в 1605 г.), Нор-Нахичевана (основан в 1781 г.) и Григорнополя (основан в 1792 г.). Одновременно приводятся краткие сведения об истории основания названных городов и поселений, отмечается процесс утери национального своеобразия в архитектуре построенных на чужбине жилых, общественных, церковных и других зданий.

³² Նույն տեղում, էջ 67։

³³ Ժ. Անանյանն իր մենագրության մեջ չի անդրադարձել հատակագծին։ Ն. Պապուխյան այն հայտնաբերելով արխիվում (ЦГВИА, фонд ВУА, գործ 21370), հրատարակել է իր «Գրիգորիոպոլի հատակագիծը» հոդվածում (տե՛ս «Գիտություն և տեխնիկա», 1984, № 9, էջ 53—56), սխալմամբ նշելով, որ հրատարակում է առաջին անգամ։ Իրականում առաջին անգամ հրատարակվել է գեոնոս դարի սկզբին (տե՛ս Ս. Էփրիկյան. Պատկերազարդ բնաշխարհիկ բառարան, էջ 540)։